

淳

熙

稿

三



稿 熙 淳
(三)

撰 著 趙

清熙稿卷十五

七言律詩

呈辛卿二首

詩老當年聚此州。邇來零落盡山邱。公雖暫爾淹時用。天豈時令繼夙游。幽事儻多塵事絕。靈山孰與博山優。林棲相去無百里。窈窕崎嶇可後不。

今昔名流幾許人。況於室邇更身親。南州行卷雖云舊。東閣知名固若新。善頃聞右揆稱公文章。再見每懷風度遠。兩年空限往來頻。其誰爲我談名姓。車轍勤公野水濱。

進之復有湘潭之役二詩見惜別意

歲盡君當又一歸。開正我亦具征衣。祇今湖北地非遠。異日江東書恐稀。酬唱未能相數數。別離於此再依依。到家無事還宜早。柳弄色時梅片飛。

君詩悟入已多年。信手拈來總自然。靜似幽人居在谷。勇如壯士起臨邊。波瀾收卷雖餘地。光豔發舒終屬天。笑我飢吟空白首。亂蛩衰草晚風蟬。

湖洲贈別劉叔驥昆仲

吳楚相望信不通。謾憑雙眼送歸鴻。豈知留落江湖外。又得從容笑語同。膽把詩篇據別恨。莫辜杯酒對秋風。明朝徑問吳淞路。恨不與君俱短篷。

別趙常德

舊詩零落似前生。豈意公能識姓名。青眼何堪辱如故。白頭自覺已無成。普天無復歸耕處。薄祿謾爲糊口營。今日遠離別何往。壺頭路險更秦城。

別晦菴

身墮南州已覺賒。五溪從此更天涯。別腸何止成萬轉。霜鬢不堪今半加。頗念客留同此日。絕憐歸夢每還家。公如踵赴仙都約。猶擬顏頰飛佩霞。

留別邢大聲昆仲

再歲春風把酒杯。今年更覺倍遲回。海棠消息知渠負。楊柳風流笑我衰。舟過重湖定安否。書來一紙勿悠哉。是身老矣腰仍折。事待田園歸去來。

留別趙南紀

少時未識廬山好。老去知山卻遠山。白鹿何繇與絃誦。紫霄還復共躋攀。林巒有失君何意。松菊猶存我得還。俱是江東巡管內。異時書札願無慙。

留別俞孝顯孝揚

生事平生非我謀。飢寒長是費君憂。相如自厭遊成倦。曲逆人知老不侯。盡室經年曾未厭。一官千里去難留。異時安否如相憶。一問溪頭上水舟。

留別在伯

準擬梅花共賦詩。那知人事有乖離。交情自謂惟君厚。世態於今猶我知。盡室飄飄雖匪計。此心炯炯幸無欺。一官謾浪端何似。從此歸耕已自遲。

鍾子崧己丑歲簿秩滿去。今自饒州教授還。猶選人也。感嘆之餘。賦詩以別。

十四年中三別君。別君每輒嘆離羣。案惟占位崔斯立。客乃無貶鄭廣文。給札不能因狗監。校書從昔老揚雲。君顏得酒猶能少。我髮如霜不可耘。

贈別徐永叔

憶曾看竹過焦山。重記同舟駭浪間。邂逅真成肺肝熱。別離空益鬢毛斑。芻青飯白吾能設。車殆馬煩君莫還。此去江淮兩蕭瑟。爲言無遣尺書慳。

別范建康

早日學詩纔得窮。人窮乃復媿詩工。如公久已獨步外。顧我何堪猥誦中。歲晚人家方瑾戶。地長客子尙

飄蓬如聞深講救荒政。忍使簞瓢獨屢空。

別朱子大蘇召叟昆仲

薄宦塵埃易滿襟。問盟猶喜盍朋簪。只今風月一杯酒。明日雲山千里心。揚柳陰疎秋館淨。芙蓉香冷暮江深。潮回一信西興渡。頻寄相思別後吟。

留別周愚卿兄弟

四海雖云皆弟兄。悵茲薄俗與誰論。平生泛愛老逾厭。獨覺君家久更敦。百里闌干山作几。數家籬落竹爲村。異時相憶相思處。明月清風同酒樽。

留別叔驥和叔

一見梅花醒病昏。重逢雙壁競清溫。占風占雨行未已。看水看山心故存。疊疊愛渠談緒遠。斑斑覺我鬢絲繁。江天何處不須買。畝蕙畹蘭期並門。

寄周昭禮

都城飲別四年餘。寥闊無因問起居。聞道客游猶往昔。不知生理比何如。謾從詩卷追還往。肯向書筒計密疎。折得梅花睇江水。驛程千萬渺愁予。

寄劉凝遠丈二首

清時二浙湖山主。合在公家不屬人。求去非貪鏡湖賜。歸來便作許由鄰。喜聞吾黨有高退。頓使幽居忘賤貧。想見詩題硬黃紙。更無夢到軟紅塵。

水雲痛飲玉光詩。勝踐那容俗子知。此樂祇今寧夢見。臨風空爾費懷思。蘇門長嘯誰能和。赤壁成功願已遲。當日唱酬誰復與。皆云驥子好男兒。

得周畏知書。病久不報。以詩寄之。

莫道寒溫祇素書。也於朋友見親疎。自從一反南昌役。無復能安古寺居。憔悴直爲人所棄。殷勤獨肯問何如。缺然不報非緣懶。瘡癘經秋未埽除。

去年過鉅山。一見季承。自後邈不相聞。秋試度必入城。因成父行。寄之以詩。

去歲飄然反自閩。訪君曾爲駐征輪。尺書不至知殊縣。五字可追如隔晨。君與袁幹有唱酬五字詩。秦論舊聞追迺祖。漢庭那得棄平津。行當過我一飯去。要話別來長苦辛。

以孟夏唱酬陳子高詩寄季承。并借窮愁志及其兄興化集四首。

莫嘆不寄一行書。半百光陰伏枕餘。寂寞瓶儲同靖節。荒涼壁立類相如。君今爲況復何似。秋盡想應成定居。穫稻纔終還墮戶。有詩何日定遺予。

東湖共款竹多竿。妙果同登塔幾盤。衝雨衝風總幽事。一談一笑盡詩端。隨人似我空爲計。出語如君當

不刊。派後江西有驚坐。封題併與略評看。
故家不復見中州。插架聞君似鄴侯。往事誰能論牛李。舊書聊欲借窮愁。薰蕕政自難同器。涇渭懸知卒
異流。何事古今朋黨禍。力爭終以殺身酬。
著論端能擬過秦。苦催長學跨驢人。十年不調非求異。三徑爲資本作貧。回首浮梁屢還往。斷魂宿草幾
陳新。藏家有集曾三復。借我流傳莫謾珍。

九日寄和父弟

走馬憶登江上臺。聞知興廢使人哀。遙憐令澹黃花節。遠對飄零白雁來。念爾不堪懷爲惡。思余應是首
頻回。詩成寄與愁申誦。句累難教心孔開。

寄懷畏知二首

湘山峻刻湘流深。中有騷人憤世音。弔古自爲吾輩事。宦游端識故人心。別來未有音書至。歲晚勿令霜
露侵。聞道元戎今仲舉。定除塵榻伴登臨。
共旅長安暑未徂。到家忽已秋風初。十詩道別心期遠。千里相望魂夢疎。驛使梅來應寄我。衡陽雁渺更
愁予。如君仍作諸侯客。願使誰讎東觀書。
久不聞表叔張平子安否。覓使寄此。

一自書題闕寄將。不知今度幾飛霜。空云梅嶺有驛使。可奈衡陽無雁行。好趁薦章來北闕。莫因文價滯南荒。已令快閣治詩板。準擬歸舟略繫傍。

寄懷子進昆仲三首

晚雨催寒着破裘。官梅應是動揚州。相思不見蘇門隱。好在當年玉局遊。子進所居坡舊遊也。東擬向會稽探禹

穴。卻從吳市下扁舟。不須幸甚門亡恙。翻倒舊詩容我不。

雁不歸時聞有行。雁南飛處更關情。子進以暮春歸。子庸以仲冬歸。三年有句說還往。半載無書存死生。莫嘆河

山殊舉目。會須僮僕爲歡迎。四方取友吾非乏。孰若君家賢弟兄。

聞道築堂名遂初。規模渾是退居圖。子進欲築堂名遂初。退居先大夫所卜居。藏書自有三萬軸。種竹何多二百株。我似

杜陵寧老蜀。君如張翰已歸吳。詩成把酒遙相屬。門外北風方怒呼。

寄懷畏知二首

憶昨題詩歲且更。路長誰與附書行。登樓見說同王粲。爲賦懸知似賈生。杜老性非真傲誕。元龍氣自舊

嶢嶢。天寒萬物皆收斂。惟有孤松獨向榮。

馳檄傳聞思一來。溪頭幾立望牆桅。黃花又作霜前槁。白酒空留秋後醅。早歲交遊今孰在。暮年林壑要

深陪。世間名宦豈不好。只恐勢移成溺灰。

過吉水問蕭伯和兄弟云。在縣四十里之羅陂。遠不及見。以詩寄之。併呈仲和。

憶昨攜詩辱報詩。再來有約竟乖期。不應置我毋庸友。何自令人極所思。千里葉舟黃落後。一官斗粟倦游時。訪尋不見蕭齋處。風雨何由話別離。

寄南安李使君三章。其一。謝使君惠酒六尊。其二。從君乞南安石茶磨子。其三。賀使君步履復故且久。致願見之意焉。

頻宵爲月臥風前。異世風流懷謫仙。半年且闕書郵置。六輩肯來從事賢。白衣不但覓陶令。春草因之感惠連。醉裏悠悠更何夢。南池水長疊荷錢。

白擣紛紛何所如。碾成更自治家模。不盡粉身兼碎骨。爲看落雪又霏珠。體用同歸人力致。粗精孰愈磨工夫。舊聞此物獨君地。要伴筆牀能寄無。

如聞舍策已踟躕。神物護持非藥痊。爲州莫漫貪良醞。把節何遲復舊氈。但期米許頻仍乞。敢望舟同縹緲僊。別久未能成一詣。故憐終日泥陳編。

寄贈孫教授兄弟。達吉。從之。達年正之。達辰。會之。

籍甚所聞三桂堂。向來相與但南昌。橫經重識泮宮老。捧檄仍思幕府良。日暮酒尊勤洒掃。竹邊談几愛蒼涼。梅江父子風流舊。今見君家鴻雁行。

成父自太和來。相看復回。既別有作。寄之。

一馬能來破遠愁。送歸還是上扁舟。鵠原眷眷急難義。菟裘切切將老求。吾兒可使齊書帙。汝歸仍堪爲酒謀。把玩餘齡無幾許。可如置免媿江鷗。

寄俞玉汝

晦菴寄我溧陽書。報道今爲建業居。作客遽經三歲久。賦詩應盡六朝餘。莫將明月誇魚目。自昔鹽車羨蹇驢。期子歸來趁鮮健。老無筋力事犁鋤。

十二月初六夜。夢客溧陽半月。而未見晦菴。夢中以見遲爲媿。作詩謝之。首句云。平生知己晦菴老。歲晚方懷見晚差。寤而診曰。羈於一官。久去師門。精神之感。形見如此。即用其句賦詩一章寄上。

平生知己晦菴老。歲晚方懷見晚差。題詩寄公夏始盛。遺弟持書春又浮。謝安東山豈我舍。迂叟洛中常國憂。蟠桃結實動千載。朝菌不與晦朔謀。

聞劉彥說率友生過別業。以詩寄之。與彥說之約者。皆當和此詩也。

柿栗當收穫稻終。駕言野適與何窮。門生二子歸來畫。張丈殷兄鄰舍翁。豆飯芋魁吾豈乏。雞豚社酒歲仍豐。家山日日長牽念。何況傳聞襍被同。

因誠齋寄張三十叔

韶石馳書歲屢終。浮沈渺渺聽殷洪。長年苦望吾地涉。寧料它途馬首東。鴻雁又當辭瘴海。孔鸞端合在高桐。忽逢玉節春江上。再拜題詩覓寓公。

寄孫從之

顧使斯人墨綬腰。不知誰合上丹霄。得非疲瘵要摩撫。是遣循良願詔條。聞道過家猶數月。尙期論薦出公朝。過予不作一飯去。政倚相望非甚遙。

寄趙著作

有客東來爲我言。詔書傳已下修門。幡然要識朝廷意。易此方明父子恩。物望祇今誰得似。道行寧負夙心存。公其大作斯民庇。我亦耕桑安故園。

寄彭元思

憶昨寄書今幾日。缺然無地接殷勤。秋風紅葉堪題句。寒夜青燈憶對君。三徑吾將歸問路。一尊何日再論文。番湖政與冰溪接。雞犬雖遙亦共聞。

寄黃子耕

誰能一往林間寺。君獨屢過湖上村。先世文章出遺逸。當家句法有淵源。平生所識蓋無幾。盛意若何如見存。元祐蘭臺妙人物。我今寂寞媿諸孫。

寄曾季永

水竹懸知屬所思。風埃遙想未忘詩。萬言何有一杯直。三徑事須五斗爲。安否頻來道州札。緘封更得白鵝碑。政和父老猶存否。煩與殷勤訪逸遺。

寄愚卿兄弟兼屬伯威

樓外長江江上山。煙雲鷗鳥尙班班。歸來靖節荒三徑。已矣盧同屋數間。書肯細行知眼力。夢能頻見識心關。因聲重謝窮岡叟。太息劉郎去不還。時聞伯山之計。

寄趙文鼎

殷勤寄謝湖州牧。五馬誰能鬢未斑。民事雖云急期會。登臨要不負溪山。如公詎免帝城入。有詔不遲旬歲間。人士端能客張賈。聲名自不減蘇顏。謂張志和。賈牧爲魯公坡公客也。

寄道正閣黎二老師并帖季蕭兄

三年光景一篇詩。此世何堪作許離。一代聲名屬韓呂。百年衣鉢付嚴黎。風生佛屋朝談處。月滿仙壇夜步時。珍重陵陽老孫子。當時酬唱亦同之。

寄倪好問

問訊永州倪戶曹。別來歲月已滔滔。賢居幕府定餘暇。舟過浯溪今幾遭。頌出次山微自顯。詩成太史貶。

無裒。因來打寄山中本。併以張秦翰墨豪。

寄贈侯宿彥明

晁鄭風流俱外家。源流如此見津涯。難兄竟沒荒三徑。吾叔重嗟書五車。家世詩聲繼叔起。古來材秀滯長沙。順寧不作南軒死。吾道傷哉鬢已華。居書從劉子駒遊。敬夫亦所厚善者。張

李商叟傳錄臨川與黎師侯唱酬。懷曾文清公長句。用韻作四首。二寄師侯。嚴師。且懷裘父。一寄商叟。一懷文清公。併屬三君。

欲訪臨川苦恨遲。一官窘束費符移。臺高納日朝尋勝。蕉合生風夜語離。別後有懷長入夢。向來未識已傳詩。信知習氣難除洗。可怪深悲墨翟絲。

生世胡爲爾許遲。況經事變與時移。論文尙喜兩公在。一見何勝隔歲離。落木長江天未恨。清風朗月卷中詩。有懷曾子今冥漠。雨淚眞成滿面絲。

向夕相尋苦步遲。坐殘初月見陰移。關心去後幾南北。倒指從前屢合離。君歎我貧猶爲米。我憐君苦但耽詩。三山堂上冰溪水。何日扁舟兩釣絲。

歎息茶山識面遲。經過舊宅恨推移。聽泉尙想甘瓢樂。撫竹如親與物離。千首未多行世集。數篇纔刻住山詩。屬君勉力任茲事。吾道祇今夢若絲。

寄徐季純、于去非、兼屬梁和仲、曾元之、吳仲權。

西來政爾歎離居。數士英英端起予。情話不遺親且故。高交寧有數能疏。詩章許和平反暇。尊酒仍饕簿領餘。幕府河南亦名勝。願交煩爲問何如。

寄甘叔異、戶曹、賈季承、鄧南季教授二首。

去年舟上曲江磯。招隱無人詠桂枝。常恨書題苦寥闊。不堪歲月重流離。課云司戶官雖小。舊說訾洲前所遺。登臨想見日成賦。寄我何當爲解頤。嫠女牽牛皆粵分。鬱林合浦屬交州。偶逢人向渠陽去。爲寄書從八桂求。率土溥天非不廣。劍山帶水祇供愁。明年闕下皆當集。誰序盛山今日遊。

寄陳擇之

幾向圖經問水源。未知蜀道遠如天。書題無自寄鴻雁。鳥語不堪聞杜鴈。已自草堂參句法。更於錦里醉風煙。使行萬里無空反。乞與新詩到處傳。

寄周允升

覓孤春碧醉梅前。猶喜囊中有和篇。雪後晚風衝嶽路。雨餘秋色五溪邊。一書寥闊忘重寄。小別侵尋過半年。賴是時從安道逸。有時共說伯仁賢。

子耕錄寄老圃賦及千秋觀諸詩寄謝

歆向當年意不同。少卿爲有廣之風。求君政合形骸外。笑我猶拘意匠中。遠寄一朝成暴富。深藏沒世免終窮。客來賸喜誇張事。何幸交遊得是公。

寄謝景英丈

先生豈是愛監州。高興應爲雁蕩游。康樂當年空想望。雲孫今日慰淹留。幽人衲子應多識。妙偈名章可寄不。兜率蓬萊果同異。不妨歸步在丹邱。

子進昆仲俱和寄懷三詩復次韻

此山祇合便終焉。底用心勞學計然。貧賤已安身外事。功名寧顧俗間緣。舊遊要記東南勝。有句須從甲乙編。閒向晴窗遮老眼。亦堪時伴結跏禪。

古途荊棘少人行。制禮難招魯二生。世上兒曹俱覆轍。公家伯仲自爭衡。一年欲盡見松秀。衆水莫汙知渭清。保此不渝真有道。更須直以所能鳴。

有竹相娛道豈孤。信知造物未遺予。交遊更許得奇士。保社卻嗟無定居。懷玉近傳酬唱集。荆溪與說往還書。世人徇利輕翻覆。我輩百年端一如。

次韻程士和并帖元衡

滿目風埃頓爾清。祇緣朝雨過林聲。興乘政欲蟬連語。酒醒纔勝一再行。容我不應噴醉臥。憶君還復有詩成。定知今夜江東夢。夢照冰溪雪鬢生。

審知用由字韻作詩次韻

山可屐登溪可浮。崎嶇窈窕恨無由。功名竟爾異吾事。邱壑只然須我流。夏日炎蒸端畏病。秋天蕭灑信宜遊。關心懷玉山前路。要上諸峯最上頭。

次韻簽判丈

芳遊忽忽未多諧。芳事恩恩已覆盃。可恨海棠經雨盡。尙餘芍藥殿春開。公能有意巾車出。我亦乘閒步屨來。倚杖看花從迫窄。未妨隨處一徘徊。

次韻斯遠見寄

春今半歷未知春。可奈昏昏晝復晨。藥裏豈能治許病。詩囊亦覺頓成貧。羲和送日何其怯。天女司花不解神。何但子行無所詣。我懷端亦在湖濱。

次韻何叔信

苔蘚斑斑過雨廊。菱荷獵獵晚秋鄉。廬山大似要元亮。江夏安能隱戴良。酒遇諸豪君可敵。詩逢二妙我無長。昔何勇銳今何怯。暢敘深孤詠與觴。